



Broj: 02-05-1040/19
Datum, 04.10.2019. godine

ZAPISNIK **sa 29. redovne sjednice 6. saziva Općinskog vijeća Doboj Istok**

Dvadesetdeveta redovna sjednica 6. saziva Općinskog vijeća održana je dana 28.09.2019. godine u zgradi općine Doboj Istok, u Klokočnici, sa početkom u 10,00 sati.

PRISUTNI: 16 vijećnika, Kemal Bratić, općinski načelnik, Omer Hadžić, sekretar općine, Enes Bećirović, pomoćnik općinskog načelnika prostornog uređenja, Admir Šišić, ovlašteno lice da zamjenjuje pomoćnika općinskog načelnika za društvene djelatnosti, branilačko – invalidsku zaštitu i opću upravu, Alirizah Mujkić, pomoćnik općinskog načelnika za poduzetništvo i finansije, Elmir Babić, direktor JKP „ČISTO“ d.o.o. Doboj Istok, Lejla Hasanović, općinski pravobranilac, te predstavnik RTV TK.

ODSUTNI: Emira Karić, predsjednica kluba vijećnika SDP.

Sjednicu je otvorio i vodio predsjedavajući Općinskog vijeća, dr. Ferid Konjić.

Dr. Ferid Konjić, predsjedavajući Općinskog vijeća: „Selamim načelnika sa saradnicima, kolegice i kolege vijećnike, predstavnike medija i goste. Otvaram 29. redovnu sjednicu Općinskog vijeća. Izostanak je najavila Emira Karić. Molim tehničkog sekretara da nam provjeri prisutnost ostalih vijećnika. Ostali vijećnici su prisutni.“

VIJEĆNIČKA PITANJA I INICIJATIVE

Dr. Ferid Konjić, predsjedavajući Općinskog vijeća: „ Ukoliko ima pripremljenih vijećničkih pitanja i inicijativa dajem mogućnost da se iznesu. Ne vidim prijavljenih.“

USVAJANJE ZAPISNIKA SA PRETHODNE SJEDNICE

Dr. Ferid Konjić, predsjedavajući Općinskog vijeća: „ Dobili ste zapisnik sa prethodne sjednice i ukoliko ima primjedbi na zapisnik dajem mogućnost da se iznesu. Nema primjedbi. Ko je za zapisnik?“
Glasanje: ZA – 16, PROTIV – 0, UZDRŽANIH – 0.

USVAJANJE DNEVNOG REDA

Dr. Ferid Konjić, predsjedavajući Općinskog vijeća: „ Dobili ste prijedlog dnevnog reda, ali nisam dobio nikakvih prijedloga za dopunu dnevnog reda.“

Kemal Skopljak, vijećnik BPS-a: „Pozdravljam i selamim sve prisutne. U prijedlogu materijala za Općinsko vijeće dostavljen je dopis privrednika „DMDE“ – a koji traži pozitivno mišljenje i saglasnost za zamjenu parcele kako bi priveo kraju započetu investiciju. U razgovoru sa kolegama iz opozicije, kao i sa nekim kolegama iz pozicije, stiče se dojam da postoji raspoloženje da se pomogne kako bi se ovaj problem riješio, te ovaj privrednik završio investiciju koja je vrlo značajna za našu općinu. Napominjem da se radi o jednoj od najvećih poslijeratnih investicija u našoj općini koja treba da donese niz benefita svim građanima naše općine. Zato sam mišljenja da ovo ne treba da bude samo kao puka informacija i da izvršni organ treba da da mišljenje da li ima kakvih zakonskih smetnji da se ovaj zahtjev pozitivno riješi. Ovo je prilika da konkretno mi svi damo svoj doprinos i ispoštujemo strategiju za razvoj naše općine koju smo usvojili, a u kojoj stoji da ćemo pomagati razvoj privrede, te praviti dobar ambijent za razvoj privrede u našoj općini. Mislim da bi, ukoliko nema zakonskih smetnji, o ovom zahtjevu trebalo da se izjasni i Općinsko vijeće, jer obim same investicije prevazilazi nivo mjesne zajednice i bitan je za sve građane Doboj Istoka. Znači prijedlog je, ako postoji mogućnost, da ovo bude jedna od tačaka dnevnog reda.“

Dr. Ferid Konjić, predsjedavajući Općinskog vijeća: „Mi smo na Kolegiju raspravljali o tome i mislim da te tvoj kolega trebao izvijestiti. Vezano za tu zemlju ima tehnički problem, stopirano je i mi nismo mogli realizovati svoju odluku koju već imamo. Znači imamo donesenu odluku da se na tom prostoru gradi spomenik i zgrada za socijalno i zdravstveno osiguranje. Imamo problem, jer to još nije sa zemljaradničke zadruge skinuto na općinu. To je tehnički problem i zato se ne može razmatrati. Da je raspoloženje svih da se pomogne privrednicima govori sama tačka koju mi danas imamo. Ja sam prije 6 – 7 godina inicirao da svake godine imamo na dnevnom redu tačku o stanju privrede na našoj općini, kako bi mogli da se pripremimo i donosimo odluke koje možemo da se poboljša stanje privrede. Znači sama ta činjenica govori da smo mi apriori svi raspoloženi da se privreda pomaže i da stojimo na usluzi privrednicima. Mi smo prije, ne znam koliko mjeseci, dobili zahtjev od DMDE –a za saglasnost da se približi međi i dali smo. Gdje god mi možemo dati svoju saglasnost mi ćemo pomoći, nije nikakav spor. Mi smo na Kolegiju raspravljali o tome da nemamo tehničkih mogućnosti da se stavi tačka dnevnog reda, da nešto uradimo, jer imamo odluke koje nismo mogli realizirati, jer to nije izvršeno. I dalje se taj komad zemlje vodi na zemljaradničkoj zadruzi, tako da taj dio ne možemo uopšte razmatrati, jer prije bilo čega treba se to razriješiti, da bi mogli doći u situaciju da se raspravlja i da se dogovara.“

Kemal Bratić, općinski načelnik: „Poštovani predsjedavajući, zamjeniče, uvažene vijećnice i vijećnici esalamu alejkum i dobar dan. Osjetio sam potrebu samo da kažem par rečenica po ovom pitanju. Što se tiče Općine Doboj Istok i organa uprave, sutra naš privrednik može da nastavi radove, nema nikakvih smetnji. Dajte, nemojte da spinujemo i da od toga pravimo politički problem. Znači, sutra može nastaviti, što se mene tiče kao načelnika i kompletne uprave općine Doboj Istok. Mi nikoga ne možemo natjerati da nešto uradi ako mu to nije po volji. Ovdje je prvo bila ona varijanta zamjena i mene što se tiče neka Savjet Mjesne zajednice, zbor, bilo ko i ako su oni za i ja ću biti za. Nemojte sada da se pravimo da se krivnja prebacuje na nekog drugog, a taj uopšte, kao što se kaže, ni luka jeo ni lukom mirisao. Nema nikakve zakonske smetnje da se radovi nastave. Niko ni u jednom momentu nije rekao i kada su kamioni tamo razvalili, a građani se žalili, ja sam rekao pustite čovjeka neka radi. Ne mogu ja natjerati Izeta ili bilo koga drugog od vas da sa mnom nešto zamijeni ako ja to neću ili vi nećete. Ovdje se jednostavno spinuje. Nemojte molim vas nasjedati, jer informacije su takve kakve jesu. Znači nema zakonske smetnje što se mene tiče kao načelnika, ne petljam se u to, i službe bilo koje da se radovi sutra nastave, a prekosutra da se to otvori, naravno ako je tehnički izvodljivo. Ako ja sada hoću da dobijem sve, jer mi nešto tamo smeta, to je onda drugi par opanaka. Za mene je mjerodavno, ako se nešto radi u Klokočnici, da pitamo ljude iz Klokočnice, Lukavici, da pitamo ljude iz Lukavice, u Velikoj Brijesnici, da pitamo ljude iz Velike Brijesnice šta misle o tome, hoće li ili neće itd. Ne mogu ja predstavljati Veliku Brijesnicu. Za mene je legalno izabran Savjet Mjesne zajednice koji trenutno predstavlja građane Velike Brijesnice. Kako će to biti za mjesec, dva ili pet godina, ne znam, ali sada je takvo stanje kakvo jeste. Mislim da je taj Savjet bio korektan, po onome što ja imam informacija, a imate ih svi, jer mi smo mala sredina tako da znamo kakve ko čarape nosi. Tako da molim sve vijećnike i iz pozicije i iz opozicije da ne nasjedaju na te stvari. Što je najbitnije, nema nikakve zakonske smetnje da se nastavi raditi, a sada što ja hoću nešto drugo to je drugi par opanaka. Ja pozivam privrednika da nastavi radove, niko mu neće smetati. Ako ta zgrada smeta, meni ne smeta. Mi ćemo nju urediti da bude ljepša, pa možda neće ni smetati. Ako je treba izmjestiti, neka se dogovore, ja sam i za to. Ako je treba otkupiti, opet neka se dogovore, ali smatram da nije korektno da Vijeće raspravlja o tome, a da ti ljudi koji trenutno predstavljaju Savjet Mjesne zajednice da nisu za neku određenu stvar. Trebaju da sjednu da se dogovore i sve što se oni dogovore, mi treba ovdje da podržimo, a ne da od toga pravimo politički problem. Načelnik je kriv što se zaustavilo. Gdje sam ja to kriv? Po čemu sam ja to kriv? Po čemu je krivo Vijeće? Po čemu je kriva služba? Ni jedna dozvola nije štekala. Ja vas molim da govorimo istinu, ništa više. Samo istinu.“

Kemal Skopljak, vijećnik BPS-a: „Gospodine načelnice, ovdje se ne radi ni o kakvom spinu, pod broj 1. a pod broj 2. itekako treba da se pitate i vi, a i mi kada se radi o ovako velikim investicijama, jer one prevazilaze savjet mjesne zajednice. Trebali bi se svi uključiti u ovaj problem i ukoliko možemo naći rješenje da ga skupa nađemo. Nisam ja ničiji advokat ovdje, ja pokušavam samo da iznesem svoje mišljenje i dam prijedlog, ništa drugo.“

Kemal Bratić, općinski načelnik: „Ja ću se bazirati samo na jednu rečenicu ovdje u prijedlogu: da se omogućiti zamjena i samim tim nesmetan nastavak gradnje. Znači, nema smetnje za gradnju, nikakve smetnje nema za nastavak gradnje. Mi dali saglasnost da se približi tamo međa, što znači da nema nikakve smetnje. Dozvolili smo da se koristi zemljište koje je na neki način u vlasništvu općine, nismo pravili smetnje, iako smo imali određen broj pritisaka od ljudi iz Velike Brijesnice da se ugrožava parking i

saobraćaj, pa zašto se ne ide ovako, zašto se ne ide onako itd. Ja vam odgovorno tvrdim, ovdje nema nikakve smetnje za nastavak gradnje. To što kažete da prevazilazi savjet mjesne zajednice, oni su vlasnici toga. To što mora dati saglasnost Vijeće ako se oni odluče za nekakvu zamjenu ili prodaju to je drugi par opanaka. Sreća imamo tu i pravobranioca koji je prisutan. Meni ne pada na pamet da ja nekoga prisiljavam na nešto za šta nisu. Evo nagovorite ih vi uvaženi vijećniče, sjedite vi sa njima. Hajmo napraviti neku komisiju od Vijeća, ja sam i zato. Ali vam odgovorno tvrdim, ono što je najbitnije, nema nikakve smetnje za nastavak gradnje i ulaganje investicija u taj objekat. O čemu pričamo? Što se mene tiče možete staviti kao tačku dnevnog reda.“

Dr. Ferid Konjić, predsjedavajući Općinskog vijeća: „Mi smo na Kolegiju raspravljali i ja sam tada reagovao da neću nikada prihvatiti da smo mi kočnica nekog razvoja. Ne ulazim u nekakve druge stvari, jer tržište diktira mnogo što šta i to je jasno svakome. Što bude do nas mi ćemo sigurno pomoći i donijeti. Znači ovo uopšte nije nikakav spor i nikada neće ni biti. Neću nikada ni od koga prihvatiti da mi sprečavamo nekoga. Sve što god je traženo od nas gdje mi odlučujemo, mi ćemo dati. Neke druge stvari da mi kočimo, da mi sprječavamo da se nastavi gradnja, a da li je zaustavljena gradnja ili nije zaustavljena gradnja uopšte ne ulazim u to, jer ne možemo mi zaustaviti gradnju i nećemo zaustaviti gradnju. To neću prihvatiti i tako sam reagovao na Kolegiju. Sve je to preneseno i nema potrebe da sada pričamo o nečemu što smo već raspravili na Kolegiju. Znači bilo je na Kolegiju, a imaju klubovi koji treba da prenesu šta smo mi diskutovali i zbog čega nismo stavili tačku dnevnog reda da danas raspravljamo. Gubit ćemo vrijeme a ništa nećemo moći donijeti, nikakvu odluku nećemo moći donijeti. Kada bude došlo do nas sve pripremljeno i da mi trebamo dati saglasnost za bilo šta, sigurno neće biti nikakvih problema da mi damo saglasnost za razvoj privrede. Zamjena teza, nikada neću dozvoliti da se zamjenjuju teze, a rekao sam ovdje je zamjena teza. Ne trebamo se time baviti, bolje da idemo rješavati problem, ako ima problem da se problem rješava, ali nemojmo zamjenjivati teze, jer zamjenjivanjem teza samo još više natežemo. Ako se budemo natezali onda će tek tada biti problemi. Bojim se da se ništa neće postići ako se budu zamjenjivale teze.“

Mehmed Mehinović, predsjednik kluba vijećnika SBiH: „Naravno moram reći da smo na Kolegiju dugo pričali o ovome. Bilo je različitih mišljenja i neću reći da je neko u pravu, a neko nije u pravu. Međutim, moram zbog tehničke ispravnosti da kažem da u zahtjevu DMDE –a jasno stoji da hoće da zamijeni parcelu kojoj nije vlasnik mjesna zajednica, nego je vlasnik Općina. Naravno da Vijeće mora raspravljati o tome da vidi hoće li zamijeniti tu parcelu ili neće. Nikakvih zamjena teza nema, jer se radi o parceli kojoj je vlasnik Općina i Vijeće mora donijeti odluku hoće li se zamijeniti ta parcela ili neće. Prema tome po meni ovdje nije da dižemo tenzije, jer nema razloga da dižemo tenzije. Dugo smo raspravljali na Kolegiju zaista. Znači ovdje se ne radi o prostoru kojem je vlasnik mjesna zajednica, nego prostoru za koji smo mi donosili odluke za izgradnju spomenika i za izgradnju zgrade Centra za socijalni rad. Radi se o toj parceli i da vidimo hoće li ići na Vijeće ili neće, imamo li mi interesa ili nemamo interesa da damo svoje mišljenje o tome. Ništa drugo, ne treba dizati tenzije uopšte.“

Dr. Ferid Konjić, predsjedavajući Općinskog vijeća: „Niko ne diže tenzije. Ja sam na samom početku rekao da mi imamo odluke za taj prostor da se gradi spomenik. Imamo stav DMDE –a da se odmaknemo 3 metra od međe. Šef službe nam je rekao, naknadno je saznao, da nije još završen prelazak te parcele sa zemljaradničke zadruge na Općinu. Rekao sam tehnički i to je rečeno na Kolegiju. Molim uvaženog vijećnika da to zapamti. Znači rečeno je na Kolegiju da se ta zemlja i dalje vodi na zemljaradničkoj zadruzi i dok ne pređe na Općinu, nemamo tehničke mogućnosti uopšte da raspravljamo o tome. Drugi dio nisam ni spominjao, ali je priča da mi zaustavljamo gradnju i za to sam rekao da je zamjena teza. Mi ne zaustavljamo gradnju. To je zamjena teza. Ako ima još neko da nešto kaže. Hvala. Dobili ste prijedlog dnevnog reda i dajem na izjašnjavanje. Ko je za ovaj dnevni red?“

Glasanje: ZA – 13, PROTIV – 0, UZDRŽANIH – 3.

Usvojen je sljedeći:

DNEVNI RED

1. Razmatranje i usvajanje prijedloga Odluke o uslovima i postupku za ostvarivanje prava na obavezno zdravstveno osiguranje lica u statusu socijalne potrebe na području općine Doboj Istok,
2. Razmatranje i usvajanje prijedloga Odluke o davanju prethodne saglasnosti na Odluku o formiranju Radne grupe za pripremu prijedloga projekta JPP „Toplifikacija centralnog dijela naselja Klokotnica, općina Doboj Istok“,

3. *Razmatranje i usvajanje prijedloga Odluke o obrazovanju Komisije za utvrđivanje prometne vrijednosti nepokretnosti i prava,*
4. *Razmatranje i usvajanje prijedloga Odluke o dodjeli mandata novom članu Savjeta MZ Lukavica Rijeka,*
5. *Razmatranje i usvajanje prijedloga Rješenja o razrješenju člana Upravnog odbora JU Centar za socijalni rad Doboj Istok,*
6. *Razmatranje i usvajanje Izvještaja o realizaciji budžeta općine Doboj Istok za period januar-juni 2019. godine,*
7. *Razmatranje i usvajanje Izvještaja o utrošku sredstava budžetske rezerve za period januar-juni 2019. godinu,*
8. *Razmatranje i usvajanje Informacije o stanju u privredi u općini Doboj Istok za 2018. godinu,*
9. *Razmatranje i usvajanje Informacije o uspjehu sportskih klubova u takmičarskoj sezoni 2018/2019. godine,*
10. *Razmatranje i usvajanje Informacije o provedenim aktivnostima povodom obilježavanja Dana brigade,*
11. *Razmatranje i usvajanje Informacije o realizaciji odluka i zaključaka Općinskog vijeća za period januar-juni 2019. godine,*
12. *Razmatranje zahtjeva JKP „ČISTO“ d.o.o. Doboj Istok za prethodnu saglasnost za cijene komunalnih usluga,*
13. *Razmatranje Molbe Šećerović Mevlide za sporazumno izvršenje presude,*
14. *Razmatranje zahtjeva JP Elektroprivreda BiH d.d. Sarajevo Podružnica „Elektrodistribucija“ Tuzla za izdavanje saglasnosti za polaganje podzemnog kabla i prokopavanje javne površine kroz parcelu k.č. broj: 2477 K.O. Brijesnica Mala upisano kao javno dobro u opštoj upotrebi/Općina Doboj Istok u dužini od cca 7 m u vezi izgradnje elektroenergetskog objekta: priključni vod za KSF6 10 (20) 0,4 kV „Furnir-Fix“ doo Brijesnica Mala,*
15. *Razmatranje zahtjeva Kakeš (Mevludina) Arifa iz Klokotnice za davanje saglasnosti susjeda,*
16. *Razmatranje zahtjeva Hodžić (Ibrahima) Alije iz Brijesnice Velike za davanje saglasnosti susjeda,*
17. *Razmatranje zahtjeva Mujkić (Habiba) Sejfudina iz Klokotnice za davanje saglasnosti susjeda.*

REALIZACIJA DNEVNOG REDA

Ad. 1. Razmatranje i usvajanje prijedloga Odluke o uslovima i postupku za ostvarivanje prava na obavezno zdravstveno osiguranje lica u statusu socijalne potrebe na području općine Doboj Istok

Dr. Ferid Konjić, predsjedavajući Općinskog vijeća: „ Materijal te dobili, tačku dajem na diskusiju.“

Selmin Karić, vijećnik SDA: „ Uvaženi predsjedavajući, zamjeniče, kolege i kolegice vijećnici, predstavnici medija esalamu alejkum i dobar dan. Kada je u pitanju prijedlog ove Odluke obzirom da je to naša zakonska obaveza, a imajući u vidu da neće u nekoj većoj mjeri uticati na izvršenje Budžeta općine Doboj Istok, Komisija za budžet i finansije smatra da prijedlog ove Odluke treba prihvatiti. Mi imamo informaciju da se trenutno radi o samo jednoj osobi, tako da se ovo može realizovati ili preko budžetske rezerve ili neke druge pozicije ostalih rashoda. Naravno to ćemo ostaviti onom ko je zadužen za izvršenje budžeta.“

Dr. Ferid Konjić, predsjedavajući Općinskog vijeća: „ Ima li još diskutanata? Ne vidim prijavljenih diskutanata i dajem na izjašnjanje. Ko je za ovu Odluku?“

Glasanje: ZA – 16, PROTIV – 0, UZDRŽANIH – 0.

Ad.2. Razmatranje i usvajanje prijedloga Odluke o davanju prethodne saglasnosti na Odluku o formiranju Radne grupe za pripremu prijedloga projekta JPP „Toplifikacija centralnog dijela naselja Klokotnica, općina Doboj Istok“

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Ne vidim prijavljenih diskutanata i dajem na izjašnjanje. Ko je za ovu Odluku? „

Glasanje: ZA – 16, PROTIV – 0, UZDRŽANIH – 0.

Ad.3. Razmatranje i usvajanje prijedloga Odluke o obrazovanju Komisije za utvrđivanje prometne vrijednosti nepokretnosti i prava

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju.“

Senada Džanić, predsjednica kluba vijećnika SBB -LDS: „, Selamim vas i pozdravljam. Pošto sam predsjednica Komisije za izbor i imenovanje Komisija je imala prijedlog da se za zemljište koje se ne nalazi u građevinskoj zoni smanji ova taksa sa 100 KM na 50 KM, odnosno za 50 %. U razgovoru sa načelnikom i službom shvatila sam da je nemoguće da se to u ovom momentu uradi zato što je rad Komisije besplatan, ali se taksa za utvrđivanje prometne vrijednosti nepokretnosti naplaćuje 100 KM, odnosno Komisija izlazi na teren bez obzira da li se radi o građevinskom ili nekoj drugoj vrsti zemljišta. Tako da smo odustali od tog prijedloga s tim da ako je moguće u narednom periodu kod izrade nacrtu budžeta da prijedlog bude da se ova taksa smanji po pitanju bilo koje vrste zemljišta.“

Dr. Ferid Konjić, predsjedavajući Općinskog vijeća: „Ima li još diskutanata? Ne vidim prijavljenih diskutanata. Ko je za ovu Odluku?“

Glasanje: ZA – 16, PROTIV – 0, UZDRŽANIH – 0.

Ad.4. Razmatranje i usvajanje prijedloga Odluke o dodjeli mandata novom članu Savjeta MZ Lukavica Rijeka.

Dr. Ferid Konjić, predsjedavajući Općinskog vijeća: „Materijal ste dobili, dajem tačku na diskusiju. Ne vidim prijavljenih diskutanata i dajem na izjašnjavanje. Ko je za ovu Odluku?“

Glasanje: ZA – 16, PROTIV – 0, UZDRŽANIH – 0.

Ad.5. Razmatranje i usvajanje prijedloga Rješenja o razrješenju člana Upravnog odbora JU Centar za socijalni rad Doboj Istok

Dr. Ferid Konjić, predsjedavajući Općinskog vijeća: „Materijal ste dobili, dajem tačku na diskusiju. Ne vidim prijavljenih diskutanata i dajem na izjašnjavanje. Ko je za?“

Glasanje: ZA – 16, PROTIV – 0, UZDRŽANIH – 0.

Ad.6. Razmatranje i usvajanje Izvještaja o realizaciji budžeta općine Doboj Istok za period januar-juni 2019. godine

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju.“

Selmin Karić, vijećnik SDA: „ Iz priloženog dokumenta se može vidjeti da je izvršenje budžeta na prihodima 44,75%, a na rashodima 38,22 %, s razlikom od 6,5 % što nije tako u konačnici loše. Razlog što nije u potpunosti izvršeno je, uglavnom kao i ranije, nerealizacija potpora sa viših nivoa, a inače bez tih potpora realizacija bi bila skoro 50 % što implicira da je budžet prilično dobro planiran. Ono što se takođe može primijetiti je da su prihodi od direktnih poreza, odnosno poreza na dohodak preko 50%, odnosno 54,12%, a izvršenje od indirektnih je skoro 49% što je izuzetno dobro i u suštini prate plan. Rashodi su vidjeli smo 38,22% izvršenja, a vjerovatno je razlog što su određeni projekti u toku tako da još nisu realizovani i to je ono što je bitno. Izvršenje na platama vidjeli smo da je 49 % i na svim ostalim pozicijama je uglavnom pratilo plan. Izvršenje prema udruženjima i nižim nivoima je onako kako je planirano oko 50% što je za pohvalu. Komisija je jednoglasno prihvatila Izvještaj o izvršenju budžeta u općini Doboj Istok za period januar – juni 2019. godine i predlaže Općinskom vijeću da isti usvoji.“

Dr. Ferid Konjić, predsjedavajući Općinskog vijeća: „Ima li još diskutanata? Ne vidim prijavljenih i dajem na izjašnjavanje. Ko je za ovaj Izvještaj?“

Glasanje: ZA – 10, PROTIV – 0, UZDRŽANIH – 6

Ad.7. Razmatranje i usvajanje Izvještaja o utrošku sredstava budžetske rezerve za period januar-juni 2019. godinu,

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Ne vidim prijavljenih i dajem na izjašnjavanje. Ko je za?“

Glasanje: ZA – 16, PROTIV – 0, UZDRŽANIH – 0

Ad.8. Razmatranje i usvajanje Informacije o stanju u privredi u općini Doboj Istok za 2018. godinu

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju.“

Fajik Muratović, vijećnik SDP: „ Selamim sve i pozdravljam. Žao mi je da ova tačka prođe, a da o njoj niko ne progovori ništa. Materijal je obiman i izuzetno kvalitetno i dobro urađen. Žao mi je što nemamo udruženja samostalnih privrednika da mogu pogledati ovaj dokumenat i da mogu iz dokumenta crpiti informacije koje su potrebne. Bilo ko danas sutra da otvori novo preduzeće ili obrt iz ovih dokumenta može sagledati tačno šta se može uraditi, šta je rentabilno, šta nije rentabilno. Ovaj dokumenat bi se mogao sačuvati i možda javno prezentovati ili bar neke tabele koje su ovdje urađene. Ja se stvarno zahvaljujem ljudima koji su ovo uradili. Ja se malo bakćem u ovoj privredi i razumijem se malo u tu tematiku, pa vidim neke stvari npr. 39 registrovanih poljoprivrednih obrta, a imamo tako male podsticaje, beznačajne na ovim prostorima i možda bi se nešto moglo iz toga izvući, pa poraditi na tome. Izašao sam da samo čestitam za ovaj dokumenat koji je urađen, jer mislim da bolji po pitanju privrede nije bio do sada.“

Dr. Ferid Konjić, predsjedavajući Općinskog vijeća: „Ja sam izašao da pohvalim izvještaj, jer ovo je prvi puta da smo postigli ono što smo htjeli. Mi smo insistirali na ovome da dobijemo stanje u privredi i da damo mogućnost, da kažemo gdje da uputimo i gdje mi eventualno možemo nešto uraditi da bi potpomogli privredu. Iz ovog izvještaja se mogu dobiti svi parametri koje smo mi tražili da dobijemo. Znači gdje eventualno ima bolji prolaz, gdje slabiji, gdje se šta treba potpomoći tako da je ovo baza iz koje se može puno što šta uraditi. Mislim da treba nastaviti na ovaj način. Do sada smo dobijali izvještaje koji nisu bili ovakvog kvaliteta i nisu davali ovo što smo sada dobili. Na ovaj način imamo puno nekih informacija i o broju zaposlenih i kada vidimo u odnosu na općine koje su nekakvog našeg ranga da u našoj općini ima zaposlenih kao u sve tri ove manje općine. Povećanjem zaposlenosti, možemo indirektno zaključiti, da je vjerovatno manji odliv stanovništva iz naše općine, a još puno što šta nam ova informacija daje. Ja se iskreno zahvaljujem službi što nam je dala ovakav izvještaj.“

Mehmed Mehinović, predsjednik kluba vijećnika SBiH: „ Ja imam zdravstvenih problema pa neću dužiti kao što imam običaj kada je ova tačka dnevnog reda u pitanju, ali jednostavno ne mogu na neke stvari da ne ukažem. Naravno očito je da je dobra stvar na općini Doboj Istok privreda koja naravno uvijek može biti bolja. Očito je da smo nastavili trend dobre poduzetničke sredine gdje stvaramo dobar ambijent i da smo izgleda atraktivni za nova ulaganja, međutim ima nekih opasnosti za koje nisu imali vremena da studiozno pređu i to razumijem. Ja bih ostao i duže da ukažem na neke stvari koje nam se mogu desiti eventualno u budućnosti. U prvoj tabeli - broj privrednih subjekata, 20% nije izbrisano iz evidencije koji nemaju aktivne izvještaje i ako imamo u vidu da je 60 % samostalnih djelatnosti, znači 80% ove djelatnosti, došli bi u neku opasnost da nemamo dovoljno privrednih subjekata koliko je u tabeli 1. prikazano. Takođe bih podržao prethodnika, ko je pravio izvještaj čista desetka i čini mi se da ovo može biti diplomski rad na fakultetu. Imamo opasnost u tabeli broj 2. poljoprivredni obrt kao srodna djelatnost u 2018. godini imali smo registrovanih 4, a prestalo sa radom 10. Vidimo da su podsticaji jako dobri u Doboj Istoku po meni i to ne dobri nego posve dobri i čestitam ko je omogućio da se toliko dobije podsticaja. Međutim ovo je jedan trend koji pokazuje da su neki poljoprivredni proizvođači, po meni i ne bih personalno osuđivao niti znam ko je to u pitanju, ali su vjerovatno iskoristili podsticaje da li za plastenike ili nešto drugo, pa su odjavili tu djelatnost, jer šest u jednoj godini da odjavi tu djelatnost čini mi se da nije u redu i sugerišem da treba povesti računa ko dobiva te podsticaje. Malo sam se konsultovao sa kolegom kada su u pitanju privredni subjekti koji imaju svoje ispostave, učinilo mi se da su namjerno neke ispostave izostavljene, a plaćaju pet puta veće komunalne takse od domaćih, što je možda i dobro i nije to problem. Neke ispostave su izbrisane ovdje, nema ih, pa bih molio da ih ubuduće vrate. Zaposlenost na opštini Doboj Istok ja sam uvijek govorio da je jako dobra kada se uzme u obzir koliko je sve inkomponirano u primanja, koliko ima itd. Međutim ne treba se zanositi baš tako, jer novozaposleni ne bi dobili ovakve statističke podatke, oni bi bili jasni kada bi vidjeli koliko je penzionisano u tom periodu ljudi, koliko je otišlo u inostranstvo i dobili bi jasnu sliku. Ovo ne daje nikakvu sumnju na zaposlenost na općini Doboj Istok, ona je jako dobra 1025 u privredi, što je solidno, 540 u vanprivredi, što bih volio je je manje, a ovo gore da je više, međutim to je tako kako jeste, što znači da smo i u vanprivredi dobri, ali 357 samostalnih poduzetnika, a ima ih puno registrovanih, mislim da to nije baš dobra slika. Nezaposlene osobe u Doboj Istoku, na jako solidnom smo mjestu, međutim očito se vidi da imamo i dalje trend KV i NK skoro 1436 i da je to skoro 63 % tih nezaposlenih ljudi i naravno treba kroz razvoj privrede omogućiti da ljudi mogu naći mjesto u privredi. Šta je još interesantno, vjerovatno moj kolega

Safet je to bolje od mene obradio, stanje imovine privrednih subjekata na općini Doboj Istok. Poslovna aktiva i dalje nije tako loša, a neraspoređena dobit je jako dobra i znači da li sada naši privrednici imaju stimulacije da ulažu tu dobit u proširenje proizvodnje, to je nešto drugo. Šta je još bitno? Da su dugoročne obaveze otprilike porasle. Ja nisam ovdje vidio, a AFIP je i tačni su podaci, ali ne mogu da shvatim da nema dugoročnih kredita prikazanih u tabeli, a smatram da ih ima i gdje su se izgubili u ovim tabelama ja ih nisam mogao naći, a znam da ima dugoročnih kredita. Da li je to izostavljeno namjerno ili nenamjerno, a ne bih rekao da je namjerno. Znači ova vrijednost se odnosi na 77 firmi koje su obrađene i koje aktivno rade, a ne na onih 100 i nešto iz prve tabele kako je tamo registrovano. Ovih 20 % preduzeća, a rekao sam to je negdje 30 i nešto, koje nisu poslovno aktivne i postavlja se pitanje kakve li su njihove obaveze, jer ih nema u ovim obavezama. Da li su velike obaveze ili nisu? Da li prevazilazi ovu pasivu koja je ovdje prikazana? Dosta je dobro stanje poslovnog uspjeha i broj zaposlenih je tačan, slaže se i ovdje. Još jedanput i ja na kraju, kao i prethodnik što je rekao, zahvaljujem se obrađivaču materijala i onom ko je pustio ovaj materijal u ovakvom obliku da se možemo pohvaliti nekim ljudima. Pogotovo tabela 18. i preporučujem vam da je razmotrite i da porazgovarate sa potencijalnim ulagačima u privredi, a i mi koji saradujemo sa ljudima. Ovdje se vidi kakvo je učešće dobiti, učešće u zapošljavanju, učešće u ukupnom prihodu itd. Samo ću prokomentarisati da je učešće u zapošljavanju građevinskih firmi skoro 12,10 %, a učešće neto dobiti 30,24 %. Hoću reći da ima dosta posla i dosta se radi, međutim nisko profitabilno, a učešće u dobiti najveće je, kao što je prikazano, 34,24 % u prerađivačkoj industriji. Prema tome jako dobri zaključci na kraju ove informacije. Još jedanput moja čestitka obrađivaču materijala, a trebaju pratiti i buduća Vijeća informaciju u ovakvom obliku i da ju čita ko hoće. Sačuvajte ovaj materijal, jer se stvarno može povaditi dosta lijepih i dobrih stvari o stanju privrede u općini Doboj Istok.“

Selmin Karić, vijećnik SDA: „ Informacija je izuzetno dobro urađena, veliki broj kvalitativnih i kvantitativnih podataka i kao što kolega reče svako može ponešto za sebe izvući odavde. Ukupni prihodi, kao što smo vidjeli, u odnosu na 2017. godinu su povećani za 2,10 %, a rashodi za 3,27 %. Kao što smo tamo vidjeli investicije su znatno povećane u odnosu na 2017. godinu i to implicira da su povećana i ova dugoročna zaduženja, a automatski je tamo povećana i amortizacija i vjerovatno stoga su veći i troškovi. To apsolutno nije nešto što je loše i ja smatram da je to izuzetno dobra stvar. Kao što sam rekao informacija je izuzetno dobra i tu smo mogli vidjeti da smo četvrta općina na Kantonu procentualno kada je u pitanju zaposlenost, što je izuzetno dobra stvar. Takođe kada je u pitanju razvijenost, vidjeli smo tamo da smo na sedmom mjestu na Kantonu, a u Federaciji 48 i to je izuzetno dobra stvar. Međutim nekada to može biti i nekakva kočnica obzirom da ne spadamo u red nerazvijenih, odnosno po pokazateljima smo razvijena općina i automatski imamo manje dotacija sa viših nivoa. Znači izuzetno dobra informacija. Evo kako smo vidjeli stanje je prilično zadovoljavajuće i ja se nadam da će se ovaj trend nastaviti i dalje.“

Kemal Bratić, općinski načelnik: „ Ja ne bih ulazio u suštinu bilo kojeg privrednika, odnosno preduzeća kakva je dobit, kolika su potraživanja, kolika su zaduženja, jer smatram da je to njihovo privatno pravo da o tome odlučuju i o tome donose odluku. Ono što je najbitnije jeste ova stavka broj uposlenih, jer mislim da je to jedini način da sačuvamo svoje građane, da što manje građana ide u neku drugu zemlju. Kada bi otvorili sve i iskreno razgovarali ima tu još određenih nedostataka, a to su niske plate u određenim granama i djelatnostima. Ja vjerujem da će to veoma brzo da se promijeni. Ja koristim svakodnevno priliku i razgovaram sa privrednicima i moram reći da određena grupacija privrednika zbilja daju za naše uslove solidne plate. Moja procjena je da će vjerovatno za godinu dvije realni sektor prestići ova druga radna mjesta u upravi, u domovima zdravlja, u školama itd. Zašto? Zato što ako želite da vam neki stručnjak radi morate ga naravno dobro i platiti. Po statistici mi smo peta općina na Kantonu, ne govorim samo po ovom izvještaju, a 30 u Federaciji. Kao što neko prije mene reče nije dobro, ali jest dobro, dobro je to. Projekat koji ćemo mi uraditi na općini je najmanje bitan, džaba ga radimo ukoliko nema građana. Znači džaba ćemo raditi puteve, rasvjete, kanalizaciju itd. Najbitnija stavka je broj uposlenih i na tome trebamo raditi i u budućem periodu. Naravno ima tu određen procenat, a svi ćete se sa mnom složiti, sive ekonomije. Znači ljudi nisu na ovom spisku iz nekog razloga. Ima dosta i radnika koji kažu nemojte me osigurati, nemojte me prijaviti iz određenog razloga. Ja vjerujem da će se u narednom periodu i taj broj smanjivati, jer svjedoci ste da se donose određene zakonske promjene kada se radi o porezu na dohodak, pa će vjerovatno i to doprinijeti. Sve u svemu naš zadatak je da, kao što neko prije mene reče, stvaramo jedan dobar ambijent. U poslovanje i način poslovanja bilo kojeg privrednog subjekta mi ne možemo niti trebamo ulaziti. Naravno trebamo pomoći ono što možemo pomoći i najbitnije ne trebamo nikome od njih odmagati. O samom aktu to je zbir statističkih podataka i to je služba uradila sa podacima koje smo dobili od viših nivoa.“

Safet Smajilbašić, vijećnik SBB: „Selamim vas i pozdravljam sve. Ono što je bitno reći za privredu Doboj Istoka, ono što sam vidio iz ovog izvještaja, je da nije značajnije promijenjena struktura privrednih subjekata. Mi u Doboj Istoku, što sam normalno našao u ovom izvještaju, imamo 5 srednjih preduzeća koja upošljavaju 445 uposlenih, a to su ona preduzeća koja imaju 50 i više uposlenika. Malih preduzeća u Doboj Istoku imamo 26 gdje je uposleno 462 radnika, a to su preduzeća koja imaju 10 – 50 uposlenih. Mikro preduzeća imamo 46 gdje je uposleno 118 radnika i to su ona preduzeća koja upošljavaju od 1 – 10 uposlenih. Znači da su ključ razvoja Doboj Istoka ova srednja i mala preduzeća iz oblasti prerađivačke industrije, građevinarstva, trgovine na veliko i malo i prevoza i skladištenja. U svim segmentima, počev od bilansa stanja, bilansa uspjeha, prihoda, rashoda i dobiti, kapaciteti ove četiri grupacije učestvuju preko 85 %. Ove četiri grane o kojima sam govorio zapošljavaju negdje oko 886 radnika, a i pored toga što zapošljavaju veliki broj radnika, ipak je u 2018. godini u ovim granama došlo do smanjenja broja uposlenih za 21. Kada govorimo o statistici ljudi koji se nalaze na Birou za zapošljavanje malo me iznenadila struktura nezaposlenih ljudi u Doboj Istoku. Ne mogu da vjerujem da mi imamo 89 ljudi sa visokom stručnom spremom na evidenciji Biroa za zapošljavanje. Istovremeno ne mogu da vjerujem, što je indikativno, da mi u Doboj Istoku imamo nekvalifikovanih ljudi 678. Mi veoma često ovdje imamo rasprave o obrazovanju, osnovnom i srednjem, a vidite kakva nam je struktura ljudi, odnosno koliko imamo nekvalifikovanih, a nekvalifikovani su oni koji imaju završenu samo osnovnu ili nemaju ni osnovnu školu. Kada govorimo o platama uposlenika, prosječnoj plati u Doboj Istoku i ona je negdje 561 KM, a nije ni čudno što je ona u odnosu na Federaciju gdje je negdje 890 KM bilo prošle godine, a sada je 920 KM, jer imamo strukturu privrede ovakvu kakvu imamo. Mi imamo niskoakumulativne grane, prije svega trgovinu i prerađivačku industriju, a misli se na tekstilnu industriju. Što se tiče bilansa ovo su statistički podaci koje su naši privredni subjekti dostavili FIA i oni su obradili tih 77 privrednih subjekata i to su podaci svih 77 subjekata, ne ulazeći u ove samostalne poduzetnike koji svoje prijave podnose i Upravi prihoda. Gubitak, što sam vidio u izvještaju, iznad visine kapitala je smanjen. U 2017. godini on je iznosio negdje 1.850.000, a 31.12.2018. godine oko 400.000. Znatno je smanjen gubitak iznad kapitala, a oni koji se bave računovodstvom znaju da je to jako bitan pokazatelj. U onoj državi mi bi to rekli da jedeš supstancu, jedeš grane na kojima stojiš i na kraju krajeva padaš u nepovrat. Dugoročne obaveze su u porastu za 2,1 milion kod tih subjekata, ali su istovremeno smanjenje kratkoročne obaveze za 2,7 miliona. Pretpostavljam da su samo naši privredni subjekti svoje kratkoročne obaveze pretvorili u dugoročne i vjerovatno finansirali neke svoje razvojne planove i ako je to tako bilo bi jako dobro. Neto dobit ostvarena je sa 7.980.000 i ona je manja u odnosu na 31.12. za 900.000, ali o tom potom. Neto gubitak je ostvaren sa 424.000 i veći je nego u 2017. godini, u 2017. godini iznosio je 350.000 KM. Mi se često ovdje zaklinjemo u to naše poljoprivredno zemljište koje imamo i vjerujte pošto radim u tom sektoru veoma malo i skoro nikako se registruju dionička društva. Ovo što se sada registruje to je trend i to su poljoprivredna društva i trgovine na malo. Kod nas je jako dosta otvoreno tih poljoprivrednih društava i pored toga ovi podsticaji koji poljoprivrednici dobiju mislim da bi trebali biti mnogo veći, međutim i ovo što oni po zakonu trebaju da dobiju od Kantona i Federacije, malo malo pa oni zakazuju štrajkove, jer veoma teško dolaze to tih sredstava. Imam utisak da kod tih podsticaja najmanje koristi imaju direktni poljoprivredni proizvođači od tova junadi, pa dalje i da tu mnogo više drugi ušićare. Sve u svemu ono što znam privrednici Doboj Istoka su se oslonili na svoje kapacitete, na svoje znanje i na svoju moć. Normalno u skladu sa tim svojim mogućnostima grade svoju infrastrukturu, planiraju svoj razvoj i na kraju krajeva ostvaruju ovakve rezultate koji jesu. Ono što znam i to uvijek govorim, privrednici u općini Doboj Istok su uvijek bili umjereno zaduženi i uvijek su mnogo više vodili računa da svoj razvoj baziraju na sopstvenim izvorima, što je u jednu ruku dobro, u drugu nije. Bolje ići stepenicu po stepenicu nego zaduživat se i imati probleme koje imaju, naravno vodeći računa da je za nekoga 30.000 KM velika obaveza i veliki dug, a za nekoga 3 miliona nije veliko. Zahvalio bih se ljudima koji su radili ovaj izvještaj, jer treba dosta vremena da se složi i uradi ovakav izvještaj kakav jeste, a rezultati su prije svega rezultati naših privrednika.“

Sajib Mešić, zamjenik predsjedavajućeg Općinskog vijeća: „Poštovani predsjedavajući, načelnice sa saradnicima, uvažene kolege vijećnici, općinski pravobranioče, prisutni predstavnici medija. Ja sam osjetio potrebu da se pridružim pohvalama za ovaj izvještaj, iako smatram da je to normalno da služba radi svoj posao, ne samo u ovom slučaju, nego u svakom slučaju. U ovom slučaju su dobro odradili i svakako ovo je za pohvalu. Najvažnija stvar koju sam ja osjetio potrebu da kažem je ova zadnja stranica gdje su prikazani rezultati podsticaja za 2018. godinu što sa kantonalnog, što sa federalnog nivoa. Zašto to govorim? Iz razloga da bi ljudi koji se bave tim poslom, vrlo teškim, ali časnim, budu na neki način još više podsticani da se tim poslom bave. Često se priča da smo mi kraj sa poljoprivrednim potencijalom, da nam je šansa da se tim poslom bavimo i da građani i stanovništvo ovog područja žive od toga. Kada pogledate ove rezultate ukupno za 2018. godinu 725.000 KM na ovo područje je po osnovu podsticaja

došlo, što govori da se ljudi time jako ozbiljno bave. Sada što dođe do situacije oko same realizacije tih podsticaja to je već jedna druga priča i viši nivoi time će se baviti. U svakom slučaju ohrabrujuće je i treba pohvaliti te ljude, generalno hvaliti te ljude, koji se bave tako teškim i časnim poslom i da u budućnosti bude njih i više, a ovi rezultati za narednu godinu da budu dupli.“

Dr. Ferid Konjić, predsjedavajući Općinskog vijeća: „Ima li još diskutanata? Ne vidim prijavljenih i dajem na izjašnjavaње. Ko je za ovu informaciju?“

Glasanje: ZA – 16, PROTIV – 0, UZDRŽANIH – 0

Ad.9. Razmatranje i usvajanje Informacije o uspjehu sportskih klubova u takmičarskoj sezoni 2018/2019. godine

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju.“

Kemal Skopljak, vijećnik BPS-a: „Samo da ponovimo neke stvari. Znači ovaj izvještaj potvrđuje istinu u Doboj Istoku da imamo jako perspektivnu omladinu koja zna da se bavi sportom i koja se bavi sportom bez obzira na uslove u kojima to rade. Uslovi nisu baš najbolji i to svi znamo, pogotovo za sportove koji su kontinuirani, gdje se u čitavoj godini mora obavljati trening i gdje se djeca moraju sastajati. Svi bi trebali još malo da poradimo vezano za te dvoranske sportove, da se utople te dvorane, da dobiju grijanje, na kraju krajeva i da im pomognemo koliko možemo. Sam izvještaj je fantastično urađen, čestitam predsjedniku Sportskog saveza na ovakvom izvještaju, gdje možemo za svaki klub napraviti pegled šta je uradio i kako je uradio. Želim im uspjeh i sljedeće godine bar ovakav kakav je bio ove godine.“

Selmin Karić, vijećnik SDA: „Kolega reče informacija je izuzetno dobro urađena. Ono što bih ja stavio u drugi plan i to ću uvijek tako stavljati, su rezultati i to mene toliko ne interesuje, interesuje me ova brojka od 420 članova sa kojima radi 26 trenera. Ja mislim da je to ono zbog čega ovi klubovi i postoje i treba da postoje i zbog čega mi izdvajamo sredstva. Ja sam zato da se čak i povećaju sredstva, naravno ako će obećati da će se ovaj broj članova još više povećati. Znači što se više djece i omladine bavi sportom, bit će zdraviji i manje ćemo izdvajati za zdravstvo, a preusmjeravat ćemo sredstva ovamo u razvoj sporta. Mislim da je ovo stvarno dobar podatak i ja im želim svima da ovako nastave i još više članova da bude u ovim klubovima.“

Izet Hodžić, predsjednik kluba vijećnika GDS i nezavisni vijećnik Sajib Mešić: „Pošto se prvi puta javljam želim sve prisutne da iskreno poselamim i pozdravim. Jednostavno osjećao sam potrebu da se javim po ovoj tački dnevnog reda i da čestitam, prije svega, ljudima iz Sportskog saveza na predanom radu tokom čitavog perioda, odnosno tokom čitave kalendarske godine, odnosno takmičarskih sezona i dostavljanju informacija o radu sportskih kolektiva na području općine Doboj Istok. Mi smo veoma mala sredina sa brojem stanovnika, a vjerujte da, što se tiče sporta, zavide nam mnogo veće sredine, mnogo veće općine i gradska područja. Ne mogu da ne čestitam određenim kolektivima u sastavu Sportskog saveza općine Doboj Istok. Prije svega želim da čestitam rukovodstvu, trenerima i takmičarima Atletskog kluba Doboj Istok koji su istinski ambasadori i promotori općine Doboj Istok u čitavoj Bosni i Hercegovini, a bogami i šire. U sastavu ovog Atletskog kluba Doboj Istok imamo dva državna reprezentativca koji su i prvaci u svojim kategorijama u određenim disciplinama, a Osman Junuzović je balkanski prvak u svojoj kategoriji i svojoj disciplini. Znači to rijetko koja sredina u Bosni i Hercegovini ima. Takođe želim da čestitam ljudima iz Karate kluba Doboj Istok, jer u sastavu tog sportskog kluba imamo državnog reprezentativca Sulejmana Suljića koji je predstavljao našu državu u Španiji na Evropskom prvenstvu ove godine. Znači nije mala stvar u toj grani sporta imati državnog reprezentativca. Naravno čestitke idu i ljudima koji su u drugim sportskim kolektivima gdje su iz određenih razloga, jer to je realnost, ne možemo imati premijer ligaša. Mada je u današnjem vaktu sve moguće, ali nije realno za očekivati. Čestitke idu svim ljudima, svim takmičarima, svim sportskim radnicima i trenerima. Danas, kada postoji ne Zakon o sportu, u većini slučajeva ti ljudi rade volonterski bez ikakve nadoknade i bez ičega. Znači sastavljaju kraj sa krajem i oni su mađioničari što se tiče tog dijela. Iskrene čestitke što se tiče tog i da nastavimo sa ovakvim radom i nizanjem dobrih rezultata i bit će sve ok.“

Mehmed Mehinović, predsjednik kluba vijećnika SBiH: „Kada je nešto dobro, dobro je. U ime kluba Stranke za Bosnu i Hercegovinu čestitam članovima Sportskog saveza, odnosno predsjedniku i njegovima saradnicima. Poznato je da ova dolina Spreče, gdje se mi nalazimo, pogotovo Doboj Istok daje dobre sportiste i pametne ljude. Očito su oni nastavili taj trend da to tako bude i drago mi je, jer teško je očuvati

nešto. Oni su to dobro očuvali i čujem da dobro rade i da imaju pohvale od sportskih klubova, što me posebno raduje. Naravno i mi u Općinskom vijeću i izvršnoj vlasti moramo im dati podršku, jer oni su najbolji ambasadori Doboja Istoka i ove sredine kada nas negdje predstavljaju. Posebno me oduševila, pored ovih nogometnih klubova, atletika i trebamo posvestiti pažnju, a vidim da se daju neke pomoći, ali i trebamo tim ljudima pomoći, jer oni izlaze u Evropu, kao i Karate klub. Međutim ne treba zaboraviti klubove, a i ne zaboravljamo. Sjećam se nekih vremena od '90 do '92. Kada sam bio predsjednik sportskog saveza Doboja i proglašen sportskim radnikom i zato znam kakvi su ovo poslovi. Ovo što oni rade, oni su nadmašili tu organizaciju u Doboju koja je bila. Dobro rade i neka nastave tako, od nas će imati dobru podršku, od mene lično, a nadam se i od čitavog Vijeća.“

Hasan Hasančević, predsjednik kluba vijećnika SDA: „ Uvaženi načelnice sa saradnicima, pravobraniteljice, predsjedavajući, zamjeniče, kolegice i kolege, želim iskreno da vas poselmem i pozdravim. Pošto se prvi puta javljam, a igrom slučaja ja sam predsjednik Sportskog saveza, zahvalio bih se svima na čestitkama, međutim kroz rad, što jedan od predsjednika klubova ima običaj reći, treba izdržati. Ovo sve treba izdržati i treba dovesti do nekog nivoa opstanka. Evo mi, ako ste primijetili, imamo 10 sportskih klubova različitih, što je prednost za naš Sportski savez i što omogućuje našoj djeci bavljenje raznim vrstama sporta. Kroz ovo sve ne bi bilo realizacije ovakvih rezultata da nije Općine Doboja Istok i svih privrednika iz općine Doboja Istok. Zahvalio bih se konkretno načelniku koji prima ove naše vrhunke sportiste sa vrhunskim rezultatima i mimo ovih drugih sredstava pomaže da mogu adekvatno otići na Evropska i Balkanska prvenstva. Hvala svima i zamolit ću za buduću saradnju, ako Bog da, jer imamo, a kolega Kemal je primjetio, nesređene neke stvari. Kada šaljemo izvještaje Kantonalnom sportskom savezu, pa pošaljemo koliko imamo sportskih objekata, vjerujte oni nama kažu da je to dobro. Kao što reče kolega Meho mi imamo ovdje apetite da budemo bolji i da idemo ka boljem. Evo u narednom periodu trebamo raditi da utoplamo te dvorane i da se razdvoje ta grijanja, da bi naši klubovi koji koriste te dvorane mogli nizati bolje rezultate. Imamo jednu akciju koja je u toku za izradu plastičnog terena jedne od članica našeg Saveza tako da i to, ako Bog da, propratimo da se i taj projekat završi i vjerujte bit će rezultata. Zahvalio bih se još svim upravama i svim predsjednicima sportskih klubova na dosadašnjem radu.“

Kemal Bratić, općinski načelnik: „I ja bih iskoristio priliku da čestitam svim klubovima na rezultatima, na neki način na opstanku. Zašto ovo govorim? Govorim jer je situacija u svakom sportskom klubu, ne samo u našoj općini, nego vidite u jednom gradu Tuzla šta se dešava sa Slobodom i tamo sa nekim drugim sredinama šta je bilo sa Veležom. To su stvari koje će vjerovatno u budućnosti da dočekaju još neki klubovi. Ono što je bitno istaći je da ja ovdje prije svega čestitam trenerima, ljudima koji rade sa tom našom mladom populacijom i koji su od njih na neki način izgradili i napravili sportiste. Naravno čestitam i tim sportistima koji su uporni i koji nastavljaju i ne odustaju od aktivnog bavljenja sportom. Imam običaj reći o izdvajanjima za Sportski savez nama puno, njima malo, ali evo mi iz godine u godinu povećavamo taj iznos za 10 %. Ja se nadam, kao što neko prije mene reče, da ćemo imati sluha i za naredni budžet da makar još malo povećamo tim našim sportskim klubovima, naravno ukoliko ste vi za. Ovo što Hasan reče, naši privrednici i ja znam da oni svesrdno pomažu našim sportskim klubovima. Mislim da će, ako ne do kraja ove godine, onda početkom iduće godine, biti riješeno grijanje i u jednoj i u drugoj dvorani. Imamo evo određene planove i određena obećanja tako da ćemo popraviti situaciju. Ja ću se ovdje bazirati na naša dva sportska kluba i to na naša dva fudbalska kluba. Ja pozivam uprave i jednog i drugog kluba dajte da spustimo tenzije. Znači postoji određena grupacija, kako u jednoj mjesnoj zajednici, tako i u drugoj, koja španuje ono što ne treba da bude španovano. Nije načelnik kriv ako je neko tamo izgubio, niti to mene interesuje, niti imam kad. Neko izgubi utakmicu i načelnik je kriv što je izgubio ili načelnik razvaljivao utakmicu. Dajte da se manimo toga. Načelnik će svakom klubu pomoći koliko može pomoći i privatno i ovako poslovno. Dajte da budemo, kao što kažu oni iz Smajine stranke, dobre komšije i naši klubovi da imaju dobru saradnju. Ja sam u svojoj Klokočnici često kritizirao da nikoga ne zovu, a da ne ponude našu Mladost da dođe igrati. Moraju svi raditi zajedno da budu dobri drugovi, da se druže i da zajedno treniraju. Ja ću reći nešto što će neko možda i zloupotrijebiti, hajmo napraviti jedan klub. Hajmo napraviti jedan klub, pa kao što Izet reče da idemo u viši rang. Gdje će se igrati? Neka se igra gdje hoće. Kako će se zvati? Neka se zove kako god hoće. Hajmo napraviti jedan klub da izbjegnemo ove tenzije. Nećemo možda biti ko Tuzla City, ali možemo ići u neki viši rang sigurno, sa tim kapacitetom igrača, sa tim kapacitetom trenera itd. Ja vam obećavam, jer sam iz Klokočnice, da Klokočnica neće praviti problem. Ako i ne bude to, dajte da spustimo tenzije. Nemojte da čujem od navijača, bez obzira koja to ekipa bila, pogrdne prozivke i psovke. Kaže ne dolazim na utakmice, pa neću da dolazim na utakmice. Zašto? Psuju i vrijeđaju. Možda ne smiju neki kod kuće, pa dođu na sportski teren da liječe svoje frustracije. To je ono

što mi treba da radimo ovdje kao Općinsko vijeće i kao općinska administracija. Nadam se da nisam pokvario ove rezultate. Ova dva ili tri naša sportiste koje imamo, oni prevazilaze i Kanton, oni su državni problem. Nažalost to nije tako uređeno i mi njima pomažemo koliko možemo i oni su zahvalni. Zahvalni su i kada ih primimo i popijemo sa njima kafu i sok. Tako da im želim prije svega puno zdravlja i da izdrže u svojim namjerama da se i dalje, ako Bog da, bave sportom.“

Izet Hodžić, predsjednik kluba vijećnika GDS i nezavisni vijećnik Sajib Mešić: „Ja sam u prvom obraćanju hvalio klubove i pojedince u takmičarskom smislu, ali ponukan diskusijama prethodnika želim da kažem o trenutnoj situaciji u sportskim klubovima, ono što ja znam. Ova tačka dnevnog reda dođe jednaput u godini, pa ne vidim razloga zašto ne bi odvojili na tu tematiku 15 – 20 minuta, a veoma je bitna životna djelatnost, odnosno kao što kažu najvažnija sporedna stvar na svijetu. Situaciju u našim sportskim klubovima, ovo prevashodno govorim, a nije razlika ni u drugim, o nogometnim ili fudbalskim klubovima, nama bliža terminologija fudbalskim klubovima. Evo načelnik je rekao, a i mi smo svjedoci toga da se iz godine u godinu kada se kreira budžet, otprilike se povećavaju izdvajanja za sport u nekom određenom procentu i to se direktno reflektuje na rad klubova. Najviše zbog čega sam se javio, jer želim da kažem to da će svi klubovi, nismo samo mi izolovani i možda će na našoj općini biti u najmanjem procentu, imati problema u periodu koji je pred nama u nedostatku takmičara, odnosno igrača. Najviše klubovi koji spadaju u granu kolektivnog sporta. Za većinu igrača mi u fudbalskim klubovima prije 3 – 4 godine imali smo problem nezaposlenosti tih igrača i iznalazili smo mogućnosti da zaposlimo te igrače. Međutim sada vjerujte da i u jednom i u drugom, a vjerovatno i u trećem klubu, jer imamo treći malonogometni klub i Škola sporta, imamo problem sa zaposlenošću igrača, odnosno sa zauzetošću. Znači mi u Nogometnom klubu Doboj Istok imamo jednog igrača koji ne radi, ostali rade ili su studenti ili su u školi. Rezultati normalno ne mogu doći bez treninga, a ne možemo trenirati, ako je radno vrijeme do 4 sata u zimskom periodu pogotovo. Kažem naša je percepcija i ne treba puno mudrosti i pameti, ali imat ćemo problem što se tog dijela tiče. Druge sredine već imaju te probleme. Evidentno je iz sezone u sezonu, iz polusezone u polusezonu gašenje određenog broja klubova u sredinama gdje nema baze, gdje je mali broj stanovnika i gdje nema omladinskih pogona. Mi veliku pažnju poklanjamo našim omladinskim pogonima, jer igrač u bilo kojem sportu ne stvara se u 18 ili 19. godini i ne može se napraviti kao boca. Igrač u atletici, šahu, karateu, rukometu i kajaku, a u fudbalu pogotovo kreće od malih nogu od 6 – 7 godina. Ekipe i sredine koje nemaju tog omladinskog pogona nemaju baš svijetlu budućnost. Ja znam da svi ovi kolektivni sportski klubovi na području naše općine veliku pažnju poklanjaju omladinskom sportu. Nadamo se da će Općinsko vijeće i načelnik i u budućnosti pratiti te klubove i omogućiti što kvalitetniji rad tih klubova. Što se tiče dosadašnje saradnje, ja govorim u ime Nogometnog kluba Doboj Istok, mi smo izuzetno zadovoljni, a kao što kaže načelnik, onaj ko daje puno je, a onaj ko uzima uvijek je malo, ali neka se nastavi ovakva saradnja bit će ok.“

Dr. Ferid Konjić, predsjedavajući Općinskog vijeća: „Ima li još diskutanata? Ne vidim prijavljenih i dajem na izjašnjanje. Ko je za ovu informaciju?“

Glasanje: ZA – 16, PROTIV – 0, UZDRŽANIH – 0.

Izet Hodžić, predsjednik kluba vijećnika GDS i nezavisni vijećnik Sajib Mešić, je zatražio pauzu.

Predsjedavajući je dao pauzu od 5 minuta, do 11,20 sati.

Ad.10. Razmatranje i usvajanje Informacije o provedenim aktivnostima povodom obilježavanja Dana brigade

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Ne vidim prijavljenih i dajem na izjašnjanje. Ko je za ovu informaciju?“

Glasanje: ZA – 16, PROTIV – 0, UZDRŽANIH – 0.

Ad.11. Razmatranje i usvajanje Informacije o realizaciji odluka i zaključaka Općinskog vijeća za period januar-juni 2019. godine

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Ne vidim prijavljenih i dajem na izjašnjanje. Ko je za?“

Glasanje: ZA – 16, PROTIV – 0, UZDRŽANIH – 0.

Ad.12. Razmatranje zahtjeva JKP „ČISTO“ d.o.o. Doboj Istok za prethodnu saglasnost za cijene komunalnih usluga

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju“

Mehmed Mehinović, predsjednik kluba vijećnika SBiH: „Jedan sam od učesnika osnivanja našeg komunalnog preduzeća i pratim njegov rad od osnivanja do današnjih dana. Imam neki svoj sud o komunalnom preduzeću da obavljaju čestito i časno svoj posao. Odmah da kažem da će klub Stranke za BiH podržati ovaj prijedlog o povećanju cijena i to čista obraza, bez ikakvih ustezanja. Iskreno se nadamo da je predlagač ovakve cijene vode vodio računa koliko je to dopustivo za građane, a koliko je dovoljno komunalnom preduzeću. Iskreno da kažem čista obraza bi podržali i veću cijenu, jer smo imali izvanredno snabdijevanje vodom u teškim vremenima. Smatram da radnici zajedno sa menadžmentom preduzeća i direktorom obavljaju dobro taj posao i trebamo im puhnuti u leđa. Pošto je direktor prisutan, jer jedne godine smo imali povećanje cijena vode, pa se to utopilo u neke troškove i nije bog zna popravilo situaciju, pa da dobro sagleda kud će sa ovom razlikom prihoda i kako je usmjeriti, gdje i na koji način, da li na izmirenje obaveza. Ako opet bude izmirivao obaveze koje su nastale nećemo im Bog zna pomoći. Iskreno moje je mišljenje bilo da će ova cijena biti ponuđena i veća i kažem bio sam spreman pred građane stati i objasniti zbog čega sam digao ruku za ovakvo povećanje zato što baš nikakvih problema nisam imao ja niti bilo ko, čini mi se, jer brzo se reagovalo, brzo pumpe mijenjane. Što se mene tiče, da se izrazim, halalosum na ovakvom prijedlogu i iskreno se nadam da su dobro vodili računa, a ja sam bio spreman i za veću cijenu. Apelujem na menadžment komunalnog preduzeća da dobro vode računa i ako se ovo bude uklopilo u izmirenje nekih obaveza, a zato se moraju tražiti neki drugi izvori, a da unaprijede svoje poslovanje kroz ovo povećanje da i dalje imamo dobro vodosnabdijevanje onda će to biti pravi pogodak. Bez obzira da je donesena odluka i iduće godine kada je izborna godina vjerujte mi ja bih je podržao i ja bih branio ovakvu odluku.“

Fajik Muratović, vijećnik SDP: „Izašao sam ovdje zato što je to jako osjetljivo pitanje. Ja sam na jednom od prošlih Općinskih vijeća kada je bio izvještaj „Čista“ malo nabacivao vezano za probleme u vodovodu. Međutim, nisam bio shvaćen dobro, niti su ljudi bili upoznati dobro sa situacijom. Ako pogledamo nekakve parametre ovo je pravi izvještaj, ovdje se pokazuju svi nedostaci koji su u preduzeću. Mi smo osnivači, mi smo i sukrivci, zajedno sa njima, kada postavimo nesposobnog direktora, kada postavimo odbor koji radi kako radi i na kraju godinama se gomilaju problemi i sada je ovaj momak došao na takve probleme da ne zna kud će i šta će. Mi znamo da su te pumpe stare više od 20 godina, da se one više krpiti ne mogu i da ćemo doći u poziciju da nećemo imati vodu i redovno snabdijevanje i to će sigurno doći tako. Znamo da nam je voda na ivici zdravstvene ispravnosti, a tako i cijevi koje su azbestne na potisnom i glavnom vodu. Znamo niz stvari i da trošimo daleko više električne energije bez ikakve potrebe, da za jedan kubik vode potrošimo duplo više struje nego u bilo kojoj drugoj općini. Razlozi su što imamo dosta kamenca u vodi koji zatvori protok vode, što imamo nepravilno postavljene pumpe koje troše bespotrebno električnu energiju da bi izbacile istu količinu energije kao i druge pumpe koje po dijagramima trebaju da se instaliraju tu. Imamo pumpe iz 5 -6 država gdje se ne mogu kombinovati ti rezervni dijelovi i to je pet puta teže održavanje nego što jest, imamo predpumpne stanice gdje se kaleme pumpe gdje npr. treba da radi pumpa od 2 kW, a radi pumpa od 10 kW i troši električne energije. Kada sve to sagledamo ovo povećanje njima neće ništa značiti. Ako pogledamo da oni duguju tamo za PIO, sve ostalo će se samo uklopiti u to i trebat će im vremena da se izvuku. Samim tim dobili su kuću koju je trebalo okrečiti i iznajmljivati, znači dobili su gotov vodovod i trebali su nastaviti. Zašto nije izdvajano za amortizaciju prije? Ne bih ulazio u to. Zašto je sada problem ovakav? Gledao sam još nekih dosta pokazatelja, kao što Meho reče, i ovo je malo u ovakvim uslovima. Ima tu masa stvari koje su urađene i koje treba ispravljati. Za odvoz smeća povećanje isto tako, a ovdje piše 50% građana nisu potpisali ugovor za odvoz smeća. Karikiram samo, u moju ulicu ulazi kamion samo radi mog smeća, a pet kuća ništa. I tu su ogromni gubici i tu moramo iznaći načina i donijeti nekakvu odluku koja će natjerati te ljude i da kaže svi oni koji imaju objekat dužni su plaćati i da mu se dostavi račun. Nije platio, odmah na sud gospodo. One koji su u socijalnoj potrebi možemo isključiti iz toga. Time bi zadovoljili potrebe po pitanju odvoza smeća. Po pitanju vode, čitao sam u zapisniku, jer nisam bio na sjednici, gospodin predsjedavajući je imao jako dobar prijedlog vezano za vode koje su besplatne. Mi imamo to bogatstvo da imamo izvorišta, imamo vode koje nismo pokupili i slobodnim padom pustili građanima. Samim tim došli bi do rezultata da se može rentabilnije poslovati. U razgovoru sa građanima, oni ne shvataju, oni krive „Čisto“, međutim nije samo „Čisto“ krivo i direktor koji je tek došao, krivi smo i mi koji nismo na vrijeme reagovali. Ja ću biti suzdržan po pitanju ove cijene, mislio sam biti protiv, ali bit ću suzdržan sve dotle dok

ne bi nekakva komisija, koja bi realno sagledala situaciju i donijela stvarno realno stanje. Ako bude realno stanje da je 2 KM voda ja ću biti za to, a ako je 1,30 KM neka bude 1,30 KM, jer ovdje nisu navedeni gubici. Koliko se vode pošalje, a koliko se krade i koliko se rasipa? To ako se dovede u pravo normalno stanje koje zadovoljava standarde, mislim da bi ovo povećanje bilo sasvim ok. Ovako dati im sada, pa da nastave propadati dalje, nisam za to.“

Izet Hodžić, predsjednik kluba vijećnika GDS i nezavisni vijećnik Sajib Mešić: „Što se tiče tačke dnevnog reda koja govori o korekciji cijena vode, klub vijećnika GDS i nezavisni vijećnik Sajib Mešić podržat će ovo poskupljenje ili korekciju cijena. Nadam se da ću svojom diskusijom i ove koji će biti suzdržani natjerati malo na razmišljanje. Mi smo ovdje u zaštiti interesa, ova firma je u većinskom vlasništvu općine Doboj Istok i normalno treba da štitimo interese naših preduzeća, a normalno treba da štitimo interese građana koje prevashodno mi predstavljamo u Općinskom vijeću. Ni jedno poskupljenje nije popularno, pogotovo kada donosimo odluku ovdje na Općinskom vijeću, ali mi smo malo analizirali i tražili podatke u okruženju u drugim općinama i u samom preduzeću. Činjenica da cijena vode na području općine Doboj Istok kojom gazduje JKP „Čisto“ nije poskupljivala čitavih 10 godina govori mnogo o tome. Činjenica je i da je u tom periodu došlo par puta do poskupljenja glavnog energenta, koji je potreban za korištenje, odnosno za pumpe, električne energije. Znači u periodu od 10 godina od kada cijena vode nije poskupljivala električna energija je 2, 3 ili 4 puta poskupila, a i dizel gorivo takođe. Posebno na ono na čemu sam insistirao na tom podatku, pored svega ovoga što su govorili moji prethodni diskutanti po ovoj tački dnevnog reda, gdje će ta sredstva otići, taj dug nastao po doprinosima i to je dug JKP „Čisto“ i normalno da to JKP treba da plati. Hoću reći činjenicu da uposlenici JKP „Čisto“ nisu imali povišicu plate u zadnjih 10 godina i to samo po sebi govori. Ovo govorim sa aspekta da javnost, da građani konzumenti ovih usluga, korisnici vode mogu što bolje da razumiju. To poskupljenje kada se pogleda u procentima to je 25 % i to nije zanemarivo poskupljenje, ali kada vidimo da je to u 1000 litara za 0,30 KM poskupljuje. Znači prethodna cijena je bila 1,20 KM a sada je predložena 1,50 KM. Realno govoreći nije veliko poskupljenje ako znamo činjenicu da prosječno četveročlano domaćinstvo troši od 6 - 8 kubika vode i to je maksimalan iznos od 2,5 KM mjesečno dodatno. Komunalnom preduzeću će to puno značiti i to su otprilike veći prihodi u toku godine, na osnovu podataka koje sam imao, to je od 30 - 50.000 KM povećanje prihoda u toku čitave godine. Mislim da je realno i optimalno poskupljenje, a vrijeme će pokazati. Vjerovatno će ići i određen broj sredstava u smanjenje gubitaka vode i u poboljšanje ličnih dohodaka uposlenika. Znamo mi da što se tiče komunalne djelatnosti da to nije profitabilna djelatnost, ali što imamo bolje komunalno preduzeće i zadovoljnije radnike u tom preduzeću za očekivati je da će njihova usluga biti dosta kvalitetnija. Opet želim da apostrofiram, poskupljenje vode nije se desilo od 2009. godine i podizanje ličnih dohodaka uposlenih u JKP „Čisto“ isto nije bilo u zadnjih 10 godina. To su činjenice koje su vodile. Pričali smo kod realizacije budžeta, pogotovo tamo kod stanja u privredi, da plate u našoj općini, kao i u Federaciji iz mjeseca u mjesec rastu, pa i ti ljudi uposleni u ovom komunalnom preduzeću imaju svoje porodice i oni šalju djecu u školu koja putuju i jedu sendviče i ne vidim razloga zašto i oni ne bi osjetili rast plate od nekih simboličnih 4 - 5 %.“

Dr. Ferid Konjić, predsjedavajući Općinskog vijeća: „Bilo kakvo poskupljenje nije dobro došlo nikome. Jedino ako plate porastu, tada je dobro. Ovo što je Fajko rekao ima tu logike, ali mislim da je menadžment to već razmotrio i da na neki način sa ovim povećanjem oni treba da stvore nekakve nove preduslove. Mi možda nismo dovoljno zahvalni što imamo ovakvu vodu, jer ima sredina koje bi platile i po 5 KM da imaju vodu, ali teško mogu imati. Rekao sam na početku ovog Vijeća, ako uspijemo realizirati problem snabdijevanja vode u Stanić Rijeci i osnovnu školu u Lukavici Rijeci, kao moje nekakvo učešće u politici, ja ću biti zadovoljan. Mislim da smo riješili Stanić Rijeku, a nadam se da ćemo riješiti i Lukavicu Rijeku sa osnovnom školom, tako da smo to uspjeli. Ja ću ovdje iznijeti prijedlog koji smo rekli u ovim pripremama koje sam obavio sa direktorom da nisam pristalica linearnog poskupljenja. Oni tehnički nisu u mogućnosti da ograničimo, jer postoje standardi koliko treba za dvočlanu i četveročlanu porodicu da dobije vode i da tim bude nekakva minimalna cijena. Svako ko troši izvan toga, treba da više plati. Oni nisu u tehničkoj mogućnosti da kažu da neko ko troši 30 kubika mjesečno vode, a standard je 10 da je normalno da on tih 20 treba da plati dobro skuplje u odnosu na ovog koji plaća 10 i ko to poštuje. Vjerovatno ima dobar dio naših građana koji to poštuju, ali manji broj troši više i sada svi ostali moraju plaćati. Ja bih zamolio direktora da u nekom narednom periodu razriješi taj tehnički problem i da u nekom trenutku da korekciju cijena da svakako zaštitimo one ljude koji su savjesni i koji se pridržavaju reda i da ono što sam ja potrošio ja trebam i platiti, da ne treba neko plaćati za mene. Ja ću biti svjestan da ako ću prati auto i ako ću zalivati cvijeće i voće to ću ja i platiti sa svog računa, a ne da ide na račun ostalih, a onog ko poštuje da njega na neki način zaštitimo. Ako oni ovo uspiju realizirati da stabiliziraju

stanje, jer ne bih volio da mi dođemo u situaciju da nemamo vode, onda sigurno ne bi bio problem poskupljenje ni građanima ni ikome. Tada bi svi shvatili da je problem da ne može firma raditi i mora se poskupiti i onda ćemo poskupiti. Ovo su stvari koje mi preventivno treba da radimo i mislim da menadžment treba da vodi takvu politiku da možda i češće dođe do korekcije cijena ako će to dovesti do stabilnosti preduzeća prvenstveno stabilnosti snabdijevanja vodom. Mislim da smo mi pomalo nezahvalni, jer postaje to normalno da mi imamo vodu. To i treba da bude normalno, ali moramo znati da se to na neki način mora servisirati i mora plaćati.“

Kemal Bratić, općinski načelnik: „ Dosta onoga što sam htio reći su rekli oni koji su izlazili prije mene. Reću ću samo nekoliko podataka. Ove kisele ili mineralne na stolu su otprilike marka. Znači jedna mala bočica je marka i mi je kupujemo kako privatno, tako i na određenim prigodama. Da li je ovo povećanje cijene dovoljno? Nije. Znači po meni, nije. Da bi bila ekonomski opravdana ona bi trebala da ide još gore, ali procijenili smo zajedno u saradnji sa menadžmentom da je to tako. Bilo je tu raznih ideja kao što je predsjedavajući rekao da se ide na 10 kubika, međutim morali bi raditi novi program, a neko je ostavio auto, neko je istresao drva gdje mu je šahta itd. Ono što ja hoću da kažem jeste da su naši vodovodi poprilično stari. Oni su meni objašnjavali i to je nekakva logika, pa je pravljn jedan manji profil, pa veći, a trebalo biti npr. obratno. Prepumpavanje i neprepumpavanje. Najbitnija stvar u ovome je, kao što predsjedavajući reče, da kada ujutro ustanemo otvorimo slavinu da je ima. Desilo se svakom od nas da kada ujutro ustanemo da nema vode, da je nema sat, dva, tri ili pet. To je veoma nezgodno. Naši susjedi, općina Gračanica, tačnije Ograđenica, razgovarao sam sa kolegom iz susjedne općine da na neki način napravimo neku premosnicu, da on napravi gore nekakav rezervoar, pa da naše komunalno preduzeće prodaje određenu količinu vode. Naravno prioritet broj 1. je snabdijevanje vodom općine Doboj Istok. Mi smo renovirali ili ponovo uradili bunar u Velikoj Brijesnici i u Maloj Brijesnici i ostaje nam da uradimo još ovaj u Klokotnici. Po mojim saznanjima on još uvijek radi sa pola kapaciteta. Ono što ja znam sa nekih 16 - 17 litara, a kapacitet je preko 30 litara što je zbilja imponozantno. Mi moramo u narednom periodu, vjerovatno za sljedeću sjednicu, pripremiti odluku o taksama koja se tiče odvoza otpada. Ova dosadašnja pokazuje se da nije bila dobra, odnosno da nismo dali dobre mehanizme kako službi tako ni komunalnom preduzeću. Kaže ja nemam smeća, a nema kuće koja nema smeća. Mi svake godine određen dio sredstava izdvojimo za saniranje divljih deponija. Nažalost prave nam problem i ovi iz susjedne općine koji su u prolazu i onako ispuste par vreća otpada, pa mi moramo angažovati naše uposlenike komunalnog preduzeća da to saniraju. Bitna stvar je da na području naše općine nemamo deponiju. Ja zbilja ne znam kako će naša susjedna općina izaći na kraj sa tom deponijom koju imaju i neka im je Bog na pomoći. Da vam naglasim samo jedan primjer. Nekoliko općina imaju zajedničku divlju deponiju, čini mi se Teočak, Sapna, Čelić, Zvornik i Ugljevik, odvoz smeća po domaćinstvu jednom sedmično, jedne kante je 12 KM. Kada ja sada čujem da je neko, nije bitno, suzdržan ili protiv povećanja cijene 1 kubika ili 5 bačvi od 200 litara, da bude 1,5 KM onda je to meni zbilja simptomatično. Ako trošim 20 m³ to će biti na bazi mjeseca 6 KM jedna kutija cigareta, o čemu pričamo. Ja mislim da naši građani ne bi trebali da to dočekaju kao neku kaznu. Najbitnija stvar u svemu ovome je da općina Doboj Istok ima redovno vodosnabdijevanje. Riješili smo, kao što Ferid reče, i Stanić Rijeku i Hodžiće, znači svaki pedalj naše općine ima uredno vodosnabdijevanje. Nemam tačnih pokazatelja u Maloj Brijesnici, ali po informacijama mislim da ni tamo nema problema. Urađen je novi bunar koji je finansirala Općina, naravno obezbijedila je sredstva od Ministarstva poljoprivrede, pa je i tamo sada situacija popravljena. Kako će oni rasporediti i gdje ova sredstva, oni to najbolje znaju. Kao što neko reče 10 godina nije se diralo u to povećanje cijene i mislim da ovo povećanje nije strašno, a možda smo trebali još malo na neki način podići. Kako će ko glasati, zbilja nije bitno. Hoće li ova odluka dobiti potrebnu većinu ja iskreno ne znam. Vijećnici glasaju po svojoj savjesti, ali nemojte da kada izađemo odavde pričamo negativne stvari. 20 kubika je kutija cigareta mjesečno, to je povećanje. Komunalno preduzeće dobit će veći iznos novaca da ta sredstva ravnomjerno rasporedi, a mi ćemo morati, ako Bog da, ako budemo živi i zdravi, u narednom budžetu planirati i za nabavku određenih sredstava koja su im potrebna. To je naše preduzeće, to je firma svih građana općine Doboj Istok i moramo se prema njoj tako i odnositi.“

Mehmed Mehinović je napustio sjednicu Općinskog vijeća (opravdano).

Fajik Muratović, vijećnik SDP: „ Ova zadnja rečenica načelnika mi je nešto jako svijetlo i pozitivno. Ja sam se i javio za riječ da kažem da nije problem poskupiti, problem je što mi sutra nećemo imati snabdijevanje vodom, jer znam u kakvoj je situaciji kompletan vodovodni sistem. Ja radim sa našim preduzećem, imamo izuzetno korektnu saradnju, pa sam malo bolje upoznat oko tih tehničkih sredstava. Nekako se to kuburi i radi, zadovoljni oni sa mnom i ja sa njima i sve je u redu. Ja nemam ništa lično

protiv toga kao privrednik, ali kao građanin hoću da se pitam i ja nešto, jer to je naše preduzeće. Kao vijećnik ja imam malo upute, jer sam opozicija, nama godi da se vi zamjerite sa građanima. Nisam ja taj lik koji je zlonamjeran, pokušavam da ovo sve sagledam i kažem da 1,5 KM neće napraviti ništa u budućnosti bolje. Ova rečenica koju je načelnik sada rekao da se planiraju budžetom neka sredstva koja trebaju za interventno djelovanje i rješenje, mene ohrabruje da ćemo imati snabdijevanje sa vodom. Ja sam već popustio stav na suzdržan, bio sam protiv, a sada sam suzdržan, ne mogu dalje.“

Senada Džanić, predsjednica kluba vijećnika SBB – LDS: „Ne želim se ponavljati pošto je evo sve rečeno. Svakako želim ponoviti da je JKP „Čisto“ naše preduzeće i da će klub vijećnika LDS i SBB podržati ovo povećanje vode, jer smatramo opravdanim zbog svega navedenog iz prethodnih diskusija. Zamolila bih da u narednom periodu razmišljamo, kada je u pitanju odvoz otpada, da se iznađe mogućnost i rješenje da svi građani budu svrstani u jednu kategoriju. Govorim ovo iz razloga, jer dolazim iz Mjesne zajednice Stanić Rijeka i drago mi je što su građani u Stanić Rijeci bili na vrhu te tabele procentualno po odvozu otpada. Teško je da ne postoje deponije, teško je da ne postoji odlaganje smeća, ako građani odnosno domaćinstva nisu uvrštena na taj način. Da se ne bi doveli u narednom periodu u situaciju da trebamo izglasati povećanje otpada, pa da to ne bude ponovo po nama koji plaćamo, odnosno građanima koji svoje obaveze izvršavaju redovno. Smatram da bi se našem preduzeću Čisto uveliko povećala cifra na kvoti tamo gdje je odvoz otpada, ako nađemo mogućnost da svako domaćinstvo na Doboju Istoku plaća smeće.“

Kemal Bratić, općinski načelnik: „ Svako od nas ko je izabran za bilo koji nivo, evo vi za vijećnike, a ja za načelnika, najbolje bi bilo nekada da ne dođemo ili za izađemo kada se treba glasati, da nas nema prilikom glasanja. Ja smatram da trebamo preuzeti odgovornost i stvari sagledati realno. Vi kao privrednici, kada vam neko dođe, imate tamo tarifu i vjerovatno imate neku kalkulaciju ispod koje nećete da radite i ja to podržavam. To je cjenovnik koji ste vi odredili ili neko, ne znam i ne ulazim u to. Isto tako je i ovamo. Mi trebamo preuzeti odgovornost. Vi znate koliko smo oblijetali da se plaćaju rente, jer smo jedina bili općina koja to nije radila. Sada je došao red na ovo. Povećanje smeća ne dolazi u obzir upravo zbog ovoga što je vijećnica Senada govorila kada svi budemo plaćali onda možemo razmišljati i o tom povećanju. To je do nas, mi moramo naći modus, donijeti novu odluku da damo mehanizam komunalnom preduzeću ili službi, hoćeš li plaćati, ako nećeš, dobit ćeš kaznu za to, pa ćeš trčati da platiš odvoz smeća. Naravno moramo popraviti njihovu tehničku opremljenost određenim vozilom da može da ulazi u sve ulice. Smatram da je naša podrška komunalnom preduzeću daleko veća nego što je nekada bilo. Sanirali smo dug koji je bio 200 – 300.000 KM u neko doba i po meni se stvari polako redaju. Mi ćemo vidjeti zajedničkim snagama da uložimo u obnavljanje mreže zajedno sa menadžmentom i njihovom strukom koja radi na tome da u narednim godinama pokušamo da uložimo i da investiramo u sanaciju vodovodne mreže. Imamo pravo po zakonu i možemo naći sredstva za to. Smatram da je cijena vode od 1,5 KM, a u Tuzli je 2,5 KM taksa za sat. Ima i kod nas taksa, ali kod nas je 1 KM koliko znam. Smatram da ne treba politizirati ovakve stvari. Svi moramo preuzeti odgovornost i glasati po svojoj savjesti. Ako je stvarno nekome skupo 1,5 KM kubni metar vode, nemojte ni glasati. Kako će građani reagovati? Ja ne znam, ali sam spreman da preuzmem odgovornost i spreman sam da branim ovo o čemu danas govorimo. Ne bojim se izaći pred 1000 – 2000 građana da branim ovo, jer smatram da je najbitnija stvar da imamo vode. Bilo je situacija da nam nema vode 2 – 3 sata ili dan, pa gori sve, jer šta hod hoćeš da uradiš, treba voda. Svako neka glasa kako misli da treba da glasa.“

Izet Hodžić, predsjednik kluba vijećnika GDS i nezavisni vijećnik Sajib Mešić: „ Da ne budem pogrešno shvaćen, nisam ovdje ni glasnogovornik, ni zastupnik JKP „Čisto“. Želim da kažem da ovo nije političko pitanje, ovo je ekonomsko pitanje i menadžment preduzeća u svom zahtjevu je fino obrazložio. Ko želi da vidi i pročita da je pored ovih razloga navedeno u staroj cijeni od 1,20 KM koliko je svega šta bilo zastupljeno i koliko je bila električna energija 30%, pa održavanje 20%, pa gorivo, pa ovo, pa ono. Prethodni diskutanti su rekli da im nije jasno gdje će ta sredstva biti raspoređena, ja očekujem da će se direktor javiti ako nađe za shodno. Normalno je da treba prvo obezbijediti sredstva, pa onda da se investiraju u ono što je najpreče. Znači i u dosadašnjoj cijeni m³ vode postojali su prioriteti. Električna energija ako se ne plati svi mi to dobro znamo i u domaćinstvima i u firmama. Električna energija je prioritet broj 1. Ako nismo platili za prethodni mjesec, ljudi dođu, klap, nema igranke. Znači moramo platiti utrošak električne energije. Opet se vodim tom činjenicom, ako trošimo više električne energije, više vode ispumpavamo i više prodajemo i normalno da ćemo više naplatiti. Iz komunalnog preduzeća kažu da su oko 10.000 KM računi za električnu energiju. Nije zanemariva cifra. Znači od prodaje vode ide električna energija, doprinosi na plate i moramo imati te rezervne pumpe. Ja očekujem i napisano je ovdje

da će za 10% više sredstava biti uloženo u smanjenje gubitaka, odnosno za održavanje sekundarne i primarne mreže 10% na ovaj iznos nije zanemarivo. Samim tim od tih sredstava koja se beru na razliku ove cijene bit će usmjerena, a bilo je 20, a sada je 30 % od ukupne cijene vode, na održavanje sekundarne i primarne mreže, odnosno smanjenje gubitka vode. To su pokazatelji, kao što kaže načelnik, kome nije jasno i ko ne želi, jednostavno ova tačka je došla na dnevni red i ja se iskreno nadam da će imati potrebnu većinu za prolaz i da će većina vijećnika glasati za ovu predloženu korekciju cijena.“

Dr. Ferid Konjić, predsjedavajući Općinskog vijeća: „ Imma li još diskutantata? Ne vidim više prijavljenih i dajem na izjašnjavanje. Da nepomenem da je Mehmed Mehinović napustio sjednicu zbog zdravstvenih razloga i dalje neće biti prisutan. Ko je za ovu odluku?“

Glasanje: ZA – 11, PROTIV – 0, UZDRŽANIH – 4.

Ad.13. Razmatranje Molbe Šećerović Mevlide za sporazumno izvršenje presude

Dr. Ferid Konjić, predsjedavajući Općinskog vijeća: „ Materijal ste dobili, tačku dajem na diskusiju. Mi smo razmatrali ovaj prijedlog i zaključili smo da se ide na nagodbu da se prihvati dug koji je postignut, da se oproste kamate, ali da se naplate sudski troškovi, a da u daljem postupku naš pravobranilac pregovara i dinamiku isplaćivanja i svega toga da naknadno dogovori.“

Safet Smajilbašić, vijećnik SBiH: „ Čini mi se da smo mi raspravljali jednom o rješenju što se tiče ove Šećerović Mevlide. Ja vjerujem da imamo sada izvršno rješenje i ono je vjerovatno tu negdje u proceduri. Mene čudi, ako je već htjela nešto da radi ova Mevlida, zašto nije išla sa općinom na sudu na vansudsku nagodbu i moglo se to u toku procesa uraditi. Po onome što sam ja ugrubo vidio bilo je fino uzeti novac i potrošiti. Svakome je nama fino uzeti novac i potrošiti, ali kada treba da vratiš ono što potrošiš onda malo teže ide. Po onome što ja vidim negdje oko 10 -11.000 KM mi treba da oprostimo, ako računamo zatezne kamate 12 % godišnje i ako računamo da je to od 16.10.2017. godine, ako je rješenje izvršno. Ja neću podržati ovo, jer je svaljivanje problema sudskog na Općinsko vijeće. Sud je rekao svoje, poslao rješenje na izvršenje i šta Vijeće ima tu sada da raspravlja. Prema tome ja neću podržati ovo. Ko ima hrabrosti i ko ima volje neka ulazi u ovaj proces, a ovo je jedan proces u koji se ne treba da upušta Vijeće.“

Lejla Hasanović, općinski pravobranilac: „ Sve prisutne srdačno pozdravljam i selamim. Moram reći da je tačno da je povodom ovog prijedloga ili zahtjeva Šećerović Mevlide Vijeće oglašavalo, odnosno razmatralo njen prijedlog koji je u to vrijeme bio drugačije prirode. Dakle, tada je prijedlog bio da se isplati to u ratama koje su bile u skladu sa primanjima imenovane. Ovdje se radi o sljedećem. Nemamo još to izvršno rješenje obzirom da je Općina kada je dobila ovaj spor, to je bilo kada je Vrhovni sud uvažio reviziju Pravobranilaštva i ukinuo sve niže stepene presude, odbio tužbeni zahtjev i samo po sebi to je značilo da je Šećerović Mevlida trebala vratiti. To nije bilo izvršno sudsko rješenje. Pošto ona nije htjela dobrovoljno vratiti, mi smo morali novi sudski postupak voditi da je ona to stekla bez osnova, odnosno da je osnov naknadno otpao donošenjem presude Vrhovnog suda. Po tužbi Pravobranilaštva sud donosi presudu 07.02.2019. godine u predmet 5337694 u kojem je navedeno, kako u njenoj molbi, tako i u ovom dopisu Pravobranilaštva i na tu presudu trenutno je uložena žalba Šećerović Mevlide. Kada to bude išlo svojim tokom, ja vjerujem da je ta žalba neosnovana, doći ćemo mi i do tog izvršnog rješenja, a daleko će to biti duži period nego što mislimo, možda za 2 – 3 godine Kantonalni sud će riješiti, pa će onda općina podnijeti prijedlog zastupan po Pravobranilaštvu za prinudno izvršenje te presude, gdje će moći zahtijevati i naplatu zakonskih zateznih kamata i troškova, ali na koji način. Znači izvršenje, čak i da sada imamo prinudno izvršenje, teče u skladu sa primanjima izvršenika. Dakle, u zavisnosti od toga koju imovinu ima i šta ima. U ovom momentu je nama poznato da je ona zaposlena, ne znam u kojem statusu, da li je određeno ili neodređeno, a izvršenje se može provoditi samo na jednoj trećini primanja, odnosno plate imenovane. Nije nam poznato da ima nekretnina upisanih na svoje ime i uglavnom, drugim riječima rečeno, taj izvršni postupak, ta naplata bi tekla duži vremenski period 10 – 15 godina sve do naplate. Nije baš da se ne treba Vijeće ovim baviti, jer ovo je na neki način otpis potraživanja novčanih sredstava koja treba da dođu u budžet, a Vijeće je to koje raspolaže imovinom općine Doboj Istok. Novčana sredstva su takođe imovina – pokretna imovina i razumijem načelnika što je uputio ovaj prijedlog na Vijeće. Pravobranilaštvo mora uputiti po članu 11. Zakona o pravobranilaštvu, dakle onoga koga zastupa stav da li može zaključiti nagodbu, da li može povući tužbu, jer ne može tek tako samo odlučivati, jer bi to onda bila zloupotreba službenog položaja. Po meni je dobar prijedlog, jer u većini sudskih predmeta, ne samo u ovom, kada je općina tužena i kada dođe do nekih pregovaranja, poslije presude gleda se na to da se te

zakonske zatezne kamate otpišu. Ovo je dobra ponuda ukoliko je prihvati Vijeće da se plate troškovi postupka i glavnica, ali ako ne prihvati onda idemo u dalju proceduru. Istina nije imenovana postupila po presudi, nije isplatila i ne bih ulazila i njene razloge i Pravobranilaštvo će nastaviti dalje ukoliko se ne prihvati ovaj prijedlog. Ukoliko se prihvati gledat ćemo da zaključimo vansudsku nagodbu. Njihov je prijedlog bio da se otpišu i troškovi postupka i zakonske zatezne kamate, čak se u zahtjevu navodi daje imenovana spremna da podigne kredit i da se zaduži kako bi to isplatila. Na ovaj iznos 26.912 KM za period manji od dvije godine kamate su negdje 6.000 i nešto. Što se tiče troškova postupka oni nisu objektivno nastali da je općina ulagala određeni novčani iznos, da je plaćala takse ili nešto, on se isključivo sastoji u zastupanju Pravobranilaštva, a te troškove Pravobranilaštvo ima od 2016. godine kada je stupila na snagu izmjena Zakona o parničnom postupku, ranije nismo imali. Znači sada pravobranilac kao i advokati imaju pravo na nagradu za pristup na ročišta i to ide na budžet općine koju Pravobranilaštvo zastupa, ne ide na račun Pravobranilaštva.“

Kemal Bratić, općinski načelnik: „Ja ću samo reći da ni pravobranilac, niti ja kao onaj koji obnaša izvršnu funkciju nismo mogli napraviti vansudsku nagodbu bez saglasnosti Općinskog vijeća. Ono što ja mislim, a Safet je to lijepo rekao, dobro je da je došlo do ovoga da je Vrhovni sud donio takvu presudu da se nama sredstva vrate. Kada se desilo to nas niko ništa nije pitao, nego nam je samo sa računa skinut taj određeni iznos od 26.000 i nešto. Ja sam mišljenja da mi trebamo uzeti ono što je naše, a to je naknada od 26.000 i nastali troškovi. O zateznoj kamati, kao što pravobranilac reče, o tom potom ako ćemo čekati 10 – 15 godina, naravno ako to druga strana bude prihvatila. Mislim da mi ispod ovoga ne bi trebali ići da se vrati onaj iznos koji je nama uzet i ovi troškovi koji su nastali tokom parničnog spora. Ukoliko strana ne bude to prihvatila onda idemo do kraja i tražimo i zatezne kamate. Mislim da bi bilo bolje i ekspeditivnije i za općinu, a vjerovatno i za tu stranku, ja je lično ne poznajem, da plati iznos koji je nama uzet, jer zateznu kamatu mi nismo dali, ona se obračunava. Ja predlažem da idemo u tom pravcu da bude zaključak da stranka u postupku iznos koji smo dali plus troškove 2.000 i nešto. Naravno niko nije dobio ono što je tražio, a ona traži i troškove i kamatu. Ja ću reći slobodno ovdje da je ta stranka najmanje kriva u svemu ovome, poslije nas. Neću ulaziti u te strukture ko ju je zastupao, ko je donosio presude, a nemamo ni pravo da ulazimo u to. Tako da ja predlažem, predsjedavajući, da idemo u tom pravcu da bude jedan zaključak da se ovi troškovi od 26.000 i nešto plus troškovi koji su nastali u toku postupka, odnosno spora.“

Dr. Ferid Konjić, predsjedavajući Općinskog vijeća: „Ima li još diskutanata? Nema. Znači imamo prijedlog da se ide na vansudsku nagodbu da se izmiri osnovica plus sudski troškovi, a da se zateznih kamata odrekemo. Da se precizira rok koji treba biti realan, jer ako će podići kredit zna se procedura koliko traje i nećemo reći za godinu dana, ali u nekom periodu do šest mjeseci da se uplate sredstva, a pravobranilac da to dogovara. Ko je za ovaj prijedlog?“

Glasanje: ZA – 13, PROTIV – 0, UZDRŽANIH – 2.

Ad.14. Razmatranje zahtjeva JP Elektroprivreda BiH d.d. Sarajevo Podružnica „Elektrodistribucija“ Tuzla za izdavanje saglasnosti za polaganje podzemnog kabla i prokopavanje javne površine kroz parcelu k.č. broj: 2477 K.O. Brijesnica Mala upisano kao javno dobro u opštoj upotrebi/Općina Doboj Istok u dužini od cca 7 m u vezi izgradnje elektroenergetskog objekta: priključni vod za KSF6 10 (20) 0,4 kV „Furnir-Fix“ doo Brijesnica Mala

Dr. Ferid Konjić, predsjedavajući Općinskog vijeća: „Materijal ste dobili, stav službe ste dobili i tačku dajem na diskusiju. Ne vidim prijavljenih diskutanata. Ko je za?“

Glasanje: ZA – 13, PROTIV – 0, UZDRŽANIH – 2.

Ad.15. Razmatranje zahtjeva Kakeš (Mevludina) Arifa iz Klokotnice za davanje saglasnosti susjeda

Dr. Ferid Konjić, predsjedavajući Općinskog vijeća: „Materijal ste dobili, stav službe ste dobili i tačku dajem na diskusiju. Ne vidim prijavljenih diskutanata i dajem na izjašnjavanje. Ko je za?“

Glasanje: ZA – 13, PROTIV – 0, UZDRŽANIH – 2.

Ad.16. Razmatranje zahtjeva Hodžić (Ibrahima) Alije iz Brijesnice Velike za davanje saglasnosti susjeda

Dr. Ferid Konjić, predsjedavajući Općinskog vijeća: „ Materijal ste dobili, tačku dajem na diskusiju. Ne vidim prijavljenih diskutanata i dajem na izjašnjavaње. Ko je za? Glasanje: ZA – 13, PROTIV – 0, UZDRŽANIH – 2.

Ad.17. Razmatranje zahtjeva Mujkić (Habiba) Sejfudina iz Klokotnice za davanje saglasnosti susjeda

Dr. Ferid Konjić, predsjedavajući Općinskog vijeća: „ Materijal ste takođe dobili, tačku dajem na diskusiju. Ne vidim prijavljenih diskutanata i dajem na izjašnjavaње. Ko je za?“ Glasanje: ZA – 13, PROTIV – 0, UZDRŽANIH – 2.

Na ovaj način smo iscrpili današnji dnevni red. Hvala vam na učešću u radu.“

Sjednica je završena u 12,15 sati.

*ZAPISNIČAR
Behara Hadžić*

*SEKRETAR
Omer Hadžić*

*PREDSJEDAVAJUĆI
OPĆINSKOG VIJEĆA
dr. Ferid Konjić*

Službena zabilješka:

Zapisnik je usvojen na 30. redovnoj sjednici Općinskog vijeća Doboј Istok održanoj dana 26.10.2019. godine.

U Klokotnici, dana 28.10.2019. godine

*Zabilješku sačinio
Omer Hadžić, sekretar Općine*